

56-bob. Intellektual mulk obyektlariga bo'lgan huquqlarni himoya qilish

382-modda. Intellektual mulk obyektlariga bo'lgan huquqlarni himoya qilish borasida bojxona organlari tomonidan ko'riladigan choralar

Bojxona organlari o'z vakolatlari doirasida intellektual mulk obyektlariga bo'lgan huquqlarni himoya qilish choralarini ko'radi.

Bojxona hududiga olib kiriladigan va bojxona nazorati ostida turgan intellektual mulk obyektlariga bo'lgan huquqlarning himoya qilinishini ta'minlash uchun bojxona organlari:

intellektual mulk obyektlariga bo'lgan huquqlarning buzilganlik belgilari mavjud bo'lgan tovarlarni chiqarib yuborishni to'xtatib turishi;

intellektual mulk obyektlarini o'z ichiga olgan tovarlarni chiqarib yuborishni to'xtatib turish to'g'risidagi qarorni bekor qilishi mumkin.

383-modda. Bojxona organlari tomonidan intellektual mulk obyektlariga bo'lgan huquqlarni himoya qilish bo'yicha choralar ko'rilmaydigan tovarlar

Bojxona organlari:

1) jismoniy shaxslar tomonidan notijorat maqsadlar uchun, shu jumladan ularning manziliga xalqaro pochta va kuryerlik jo'natmalarida yuboriladigan;

2) bojxona tranziti bojxona rejimiga muvofiq;

3) diplomatik vakolatxonalar, konsullik muassasalari, xorijiy davlatlarning boshqa rasmiy vakolatxonalari, xalqaro tashkilotlar, ushbu vakolatxonalar, muassasalar va tashkilotlarning xodimlari tomonidan rasmiy va shaxsiy foydalanish uchun;

4) insonparvarlik yordami va texnik ko'mak sifatida bojxona chegarasi orqali olib o'tiladigan tovarlarga nisbatan

intellektual mulk obyektlariga bo'lgan huquqlarni himoya qilish bo'yicha choralar ko'rmaydi.

384-modda. Intellektual mulk obyektiga bo'lgan mutlaq huquqlar egasi

Intellektual mulk obyektiga bo'lgan mutlaq huquqlarga ega shaxs yoki uning vakolatli vakili intellektual mulk obyektiga bo'lgan mutlaq huquq egasi (huquq egasi) bo'ladi.

385-modda. Intellektual mulk obyektlarining bojxona reyestriga kiritish uchun ariza

Intellektual mulk obyektlarining bojxona reyestriga kiritish to'g'risidagi ariza huquq egasi yoki uning vakolatli vakili tomonidan O'zbekiston Respublikasi Davlat bojxona qo'mitasiga beriladi.

Intellektual mulk obyektlarining bojxona reyestriga kiritish to'g'risidagi arizada quyidagi ma'lumotlar ko'rsatilishi kerak:

huquq egasi yoki uning vakolatli vakili to'g'risidagi, uning nomini, rekvizitlarini, shuningdek, agar mavjud bo'lsa, elektron pochta manzilini ko'rsatgan holda;

huquq egasi yoki uning vakolatli vakili himoya qilish to'g'risida murojaat etayotgan intellektual mulk obyektining tavsifi;

vakolatli organ tomonidan berilgan intellektual mulk obyektiga bo'lgan huquqlarning amal qilish muddati haqidagi;

intellektual mulk obyektini ishlab chiqaruvchi, shuningdek huquq egasining yoki uning vakolatli vakilining vakolatlarini tasdiqlovchi hujjatlar to'g'risidagi;

intellektual mulk obyektini Intellektual mulk obyektlarining bojxona reyestriga qaysi muddatga kiritilayotgan bo'lsa, o'sha muddat haqidagi, lekin bu muddat intellektual mulk obyektini ushbu reyestriga kiritilgan kundan e'tiboran uch yildan ko'p bo'lmasligi kerak;

himoya qilinishi uchun ariza berilayotgan intellektual mulk obyektlari mavjud bo'lgan tovarlarning tavsifi (fotosuratlar,

rasmlar, chizmalar, mahsulotlarning pasportlari va boshqa ma'lumotlar).

Agar Intellektual mulk obyektlarining bojxona reyestriga kiritish to'g'risidagi ariza vakil tomonidan berilsa, ushbu arizaga vakilning vakolatlarini tasdiqlovchi hujjat ham ilova qilinadi.

Intellektual mulk obyektlarining bojxona reyestriga kiritish to'g'risidagi arizaga intellektual mulk obyektiga bo'lgan huquqlarning mavjudligi va mansubligini tasdiqlovchi mavjud hujjatlarning (patentning, guvohnomaning, litsenziya shartnomasining yoki boshqa hujjatlarning) huquq egasi tomonidan tasdiqlangan ko'chirma nusxalari ilova qilinadi.

Huquq egasi yoki uning vakolatli vakili Intellektual mulk obyektlarining bojxona reyestriga kiritilganidan keyin intellektual mulk obyektlariga bo'lgan huquqlarning himoya qilinishini ta'minlash uchun intellektual mulk obyektlariga bo'lgan huquqlarini himoya qilib bojxona organlariga bojxona nazorati ostida turgan tovarlarni chiqarib yuborishni to'xtatib turish bo'yicha choralar ko'rilishi uchun murojaat qilishi mumkin.

386-modda. Intellektual mulk obyektlarining bojxona reyestriga kiritish uchun arizani ko'rib chiqish

O'zbekiston Respublikasi Davlat bojxona qo'mitasi Intellektual mulk obyektlarining bojxona reyestriga kiritish uchun arizani u kelib tushgan kundan e'tiboran o'n kundan ko'p bo'lmagan muddatda ko'rib chiqadi va mazkur reyestriga kiritish to'g'risida yoki kiritishni rad etish haqida qaror qabul qiladi.

Huquq egasi yoki uning vakolatli vakili tomonidan taqdim etilgan ma'lumotlarning to'g'riligini tekshirish maqsadida O'zbekiston Respublikasi Davlat bojxona qo'mitasi vakolatli organlardan taqdim etilgan ma'lumotlarni tasdiqlovchi qo'shimcha axborot va hujjatlarni so'rab olishga haqli.

O'zbekiston Respublikasi Davlat bojxona qo'mitasi huquq egasiga yoki uning vakolatli vakiliga Intellektual mulk obyektlarining bojxona reyestriga kiritilganligi to'g'risida yoki

kiritish rad etilganligi haqida, rad etilishi sabablarini asoslantirgan holda xabar yuboradi.

387-modda. Intellektual mulk obyektlarining bojxona reyestrini yuritish

Intellektual mulk obyektlariga bo'lgan huquqlarni himoya qilish bo'yicha choralar qo'llanilishi to'g'risida qaror qabul qilingan intellektual mulk obyektlari O'zbekiston Respublikasi Davlat bojxona qo'mitasi tomonidan Intellektual mulk obyektlarining bojxona reyestriga kiritiladi.

O'zbekiston Respublikasi Davlat bojxona qo'mitasi Intellektual mulk obyektlarining bojxona reyestrini yuritadi va keyinchalik uni doimiy ravishda yangilab borgan holda o'z rasmiy veb-saytida vaqti-vaqti bilan e'lon qiladi.

Intellektual mulk obyektlari quyidagi hollarda Intellektual mulk obyektlarining bojxona reyestridan chiqarilishi kerak:

huquq egasining yoki uning vakolatli vakilining reyestrda chiqarilish to'g'risidagi murojaatiga ko'ra;

ushbu Kodeksning [385-moddasida](#) ko'rsatilgan hujjatlardagi noto'g'ri ma'lumotlar bojxona organi tomonidan aniqlanganda;

intellektual mulk obyektining huquqiy muhofazasi belgilangan tartibda tugatilganda;

intellektual mulk obyekti Intellektual mulk obyektlarining bojxona reyestriga kiritilgan kundan e'tiboran uch yil o'tgach;

O'zbekiston Respublikasi Intellektual mulk agentligi Apellatsiya kengashining qarori asosida.

O'zbekiston Respublikasi Davlat bojxona qo'mitasi huquq egasini yoki uning vakolatli vakilini intellektual mulk obyektlari Intellektual mulk obyektlarining bojxona reyestridan chiqarilganligi to'g'risida uch ish kuni ichida yozma shaklda xabardor qiladi.

Intellektual mulk obyektlarining bojxona reyestrini yuritish tartibi va shakli O'zbekiston Respublikasi Davlat bojxona qo'mitasi tomonidan belgilanadi.

388-modda. Intellektual mulk obyektlariga bo'lgan huquqlarni himoya qilish bo'yicha choralar ko'rish to'g'risidagi ariza

Intellektual mulk obyektlariga bo'lgan huquqlarni himoya qilish bo'yicha choralar ko'rish to'g'risidagi ariza huquq egasi yoki uning vakolatli vakili tomonidan O'zbekiston Respublikasi Davlat bojxona qo'mitasiga beriladi.

Intellektual mulk obyektlariga bo'lgan huquqlarni himoya qilish bo'yicha choralar ko'rish to'g'risidagi arizada quyidagi ma'lumotlar bo'lishi kerak:

himoya qilinishi uchun ariza berilayotgan, intellektual mulk obyektlarini o'z ichiga olgan tovarlarning tavsifi;

huquq egasining fikricha, uning intellektual mulk obyektiga bo'lgan huquqlarini buzayotgan tovarlarning, bojxona organlari bunday tovarlarni aniqlay olishi uchun yetarlicha batafsil tavsifi, agar huquq egasi yoki uning vakolatli vakili shunday ma'lumotlarga ega bo'lsa;

taxmin qilinayotgan huquqbuzarlikni aniqlash uchun ko'maklashadigan har qanday boshqa axborot (ishlab chiqaruvchi, eksport qiluvchi, import qiluvchi yoki yukni qabul qiluvchi, tovar turishi mumkin bo'lgan joy va uning bojxona chegarasi orqali olib o'tilish sanasi, tashilish xususiyatlari va o'rovining ko'rinishi, tovar turgan joy yoki rejalashtirilayotgan yetkazilish joyi to'g'risidagi ma'lumotlar).

Intellektual mulk obyektlariga bo'lgan huquqlarni himoya qilish bo'yicha choralar ko'rish to'g'risidagi arizaga huquq egasining yoki uning vakolatli vakilining tovarni chiqarib yuborishni to'xtatib turish tufayli deklarantga yetkazilishi mumkin bo'lgan mulkiy zararning o'rnini qoplash to'g'risidagi yozma shakldagi majburiyati ilova qilinadi.

389-modda. Intellektual mulk obyektlariga bo'lgan huquqlarni himoya qilish bo'yicha choralar ko'rish to'g'risidagi arizani ko'rib chiqish

O'zbekiston Respublikasi Davlat bojxona qo'mitasi intellektual mulk obyektlariga bo'lgan huquqlarni himoya qilish

bo'yicha choralar ko'rish to'g'risidagi arizani ko'rib chiqadi va tovarlarni chiqarib yuborishni to'xtatib turish to'g'risida yoki asoslantirilgan sabablarni ko'rsatgan holda uni rad etish haqida uch ish kuni ichida qaror qabul qiladi, bu haqda huquq egasini yoki uning vakolatli vakilini xabardor qiladi.

Intellectual mulk obyektlariga bo'lgan huquqlarni himoya qilish bo'yicha choralar ko'rishni rad etish to'g'risidagi qaror ushbu bobga muvofiq huquq egasi yoki uning vakolatli vakili tomonidan noto'g'ri ma'lumotlar taqdim qilingan, shuningdek ushbu Kodeksning [388-moddasida](#) belgilangan talablarga rioya etilmagan taqdirda qabul qilinadi.

390-modda. Intellectual mulk obyektlariga bo'lgan huquqlar buzilganligining belgilari bo'lgan tovarlarni chiqarib yuborishni to'xtatib turish

Intellectual mulk obyektlariga bo'lgan huquqlar buzilganligining belgilari bo'lgan tovarlarni chiqarib yuborishni to'xtatib turish ushbu Kodeksning [385](#) va [388-moddalarida](#) nazarda tutilgan shartlarga rioya etgan holda bojxona organlari tomonidan amalga oshiriladi. Intellectual mulk obyektlariga bo'lgan huquqlar buzilganligining belgilari bo'lgan tovarlarni chiqarib yuborishni to'xtatib turish huquq egasining yoki uning vakolatli vakilining sud organlariga murojaat qilishi va sudning ishni sudda ko'rish tayinlanganligi to'g'risidagi ajrimini bojxona organlariga taqdim etish maqsadida amalga oshiriladi.

Bojxona organi deklarantni va huquq egasini yoki uning vakolatli vakilini tovarlarni chiqarib yuborishni to'xtatib turish sabablari va muddatlari to'g'risida zudlik bilan xabardor qiladi.

Huquq egasi yoki uning vakolatli vakili tovarlarni chiqarib yuborishni to'xtatib turish natijasida deklarantga yetkazilgan zarar uchun, agar sud intellectual mulk obyektlariga bo'lgan huquq buzilganligi to'g'risida qaror chiqarmasa, belgilangan tartibda javobgar bo'ladi.

391-modda. Intellektual mulk obyektlarini o'z ichiga olgan tovarlarning namunalari va nusxalarini tanlab olish

Huquq egasi, uning vakolatli vakili yoki deklarant intellektual mulk obyektlarini o'z ichiga olgan qaysi tovarlarga nisbatan chiqarib yuborilishini to'xtatib turish to'g'risida qaror qabul qilingan bo'lsa, o'sha tovarlarning namunalari va nusxalarini bojxona nazorati ostida tanlab olishi, ularni tekshirishni amalga oshirishi, shuningdek ko'zdan kechirishi, fotosuratga olishi yoki shunday tovarlarni boshqacha tarzda qayd etishi mumkin.

392-modda. Intellektual mulk obyektlarini o'z ichiga olgan tovarlarni chiqarib yuborishni to'xtatib turish muddati

Huquq egasining yoki uning vakolatli vakilining arizasiga ko'ra, bojxona organlari intellektual mulk obyektlarini o'z ichiga olgan tovarlarni chiqarib yuborishni to'xtatib turishni ularni chiqarib yuborishni to'xtatib turish to'g'risida qaror qabul qilingan kundan e'tiboran o'n ish kunidan ko'p bo'lmagan muddatga amalga oshiradi.

Agar huquq egasi yoki uning vakolatli vakili sudning ishni sudda ko'rish tayinlanganligi to'g'risidagi ajrimini bojxona organlariga taqdim etgan bo'lsa, ushbu moddaning [birinchi qismida](#) ko'rsatilgan muddat huquq egasining yoki uning vakolatli vakilining so'roviga ko'ra uzaytirilishi, lekin ko'pi bilan o'n ish kuniga uzaytirilishi mumkin.

Sudning tovarlarni olib qo'yish, xatlash yoxud da'voni ta'minlashning boshqa choralarini qo'llash to'g'risidagi ajrimi (qarori) ushbu moddaning [ikkinchi qismida](#) belgilangan muddatda huquq egasi yoki uning vakolatli vakili tomonidan taqdim etilgan taqdirda, tovarlarni chiqarib yuborishni to'xtatib turish sudning ajrimiga (qaroriga) muvofiq amalga oshiriladi.

393-modda. Intellektual mulk obyektlarini o'z ichiga olgan tovarlarni chiqarib yuborishni to'xtatib turish to'g'risidagi qarorni bekor qilish

Intellektual mulk obyektlarini o'z ichiga olgan tovarlarni chiqarib yuborishni to'xtatib turish to'g'risidagi qaror quyidagi hollarda bekor qilinadi:

amal qilish muddati tugagach;

O'zbekiston Respublikasi Davlat bojxona qo'mitasiga huquq egasidan yoki uning vakolatli vakilidan tovarlarni chiqarib yuborishni to'xtatib turish to'g'risidagi qarorni bekor qilish haqida ariza kelib tushganda;

intellektual mulk obyekti ushbu Kodeks 387-moddasining [uchinchi qismiga](#) muvofiq Intellektual mulk obyektlarining bojxona reyestridan chiqarilganda;

sudning tovarlarni olib qo'yish, xatlash yoxud da'voni ta'minlashning boshqa choralarini qo'llash to'g'risidagi ajrimi (qarori) ushbu Kodeks 392-moddasining [ikkinchi qismida](#) belgilangan muddatda huquq egasi yoki uning vakolatli vakili tomonidan taqdim etilmaganda.

Tovarlarni chiqarib yuborishni to'xtatib turish to'g'risidagi qaror bekor qilingan taqdirda tovarlarni chiqarib yuborish ushbu Kodeksga muvofiq tiklanadi.